

CART NECHW DAN' BZOJ POSTLW SAN PEDRO

*Pedro chzoje' cart nga che bene' ca' zjanaslas
chesejnilaže' Criston'*

¹ Neda' Pedro naca' postlw che Jesucriston'. Na' chzoja' cart nga che le'e chejnilaže'le Jesucriston', le'e naslasle distritw ca' gan' nzi' Ponto na' Galacia na' Capadocia na' Asia na' Bitinia. Chio' chejnilaže'cho Jesucriston' naccho ca bene' zito' len yezica'chle bene' že' yežlio nga.

² Con can' bsi'e xnezen' gwlahte, Xacho Diosen' gwleje' chio' cont Spiritw chen' bocoben yichjlažda'ochon' na' gwlo'on chio' lo na' Diosen'. Bene' ca' cont chzenagcho che Jesucriston' na' cont Jesucriston' zoacze' cheyone' lažda'ochon' xilaže' dan' blalj xchenen' neche chio' le'e yag cruzen'. Chnaba' soacze Diosen' gaclenchgüe' le'e na' soacze' gone' cont soa cuezle binlochgua len xbab chelen'.

Zoacho lez šjayzoacho len Diosen'

³ Cheyala' gonxencho Diosen'. Le' naque' Xa Xancho Jesucriston', na' Xancho Jesucriston' lecze chonxene' le'. Leca cheyaše' cheži'ilaže' Diosen' chio', na' da'nan' bocobe' yichjlažda'ochon' na' bene' cont zoacho lez šjayzoacho len le', le Jesucriston' beyas bebane' ladjo bene' guat ca'.

⁴ Na' Diosen' gone' ga gac da' güen checho, to da' mbachgua da' bi yenit neca te chen, to da'

ngo'ošagüe' cont gaquen checho cate' yežincho yaban'.

⁵ Na' Diosen' len yela' guac xen chen' chcuas chcue'eje' chio' len da' malen' lagüe chejnilaže'chone'. Chone' ca' šlac biṇa' žin ža le'echo da' mba da' gone' gac checho caten' šjayzoacho len le'.

⁶ Da'nan' zoachguale mbalaz la'czla' chonen byen da' zan da' chyī chzaca'le šlož güeje ṇa'a.

⁷ La'czla' da' te che oron', beṇachen' chosozeyen' cont chesyebeje' bi da' nchixen da' bibi zaca'. Na' ca'cze zaca'lebe dan' choe' Diosen' latje chac chele, chaquen cont gwlo'ele še da' li chejnilaže'lene' cate' chac bi da' mal chele. Na' še soatezle šejnilaže'lene', leca zaca'chen clēl ca no oro. Nach cate' Jesucriston' yide' da' yoble Diosen' güe'e diža' ṇe' beṇe güen na' gone' le'e yela' bala'an xen na' gone' soale txen len le' gan' yo'ochgua be'ni'.

⁸ Chaquele Jesucriston' la'czla' biṇa' le'elne'. Na' la'czla' bi chle'elne' ṇa'a, chejnilaže'lene'. Da'nan' zoale mbalaz juisyw. Na' catec mbalaz zoale con bi chac gwzejni'ile beṇe' cayanen' chebele.

⁹ Na' da' chejnilaže'le Jesucriston', žin ža šjayzoale len Diosen'.

¹⁰⁻¹¹ Da' beṇe' ca' goso'e xtiža' Diosen' cani' gosene' yeyaše' yeži'ilaže' Diosen' chio' zoacho na'a. Spiritw che Criston' gwzoan len legaque' bzejni'in legaque' yid Criston' yežlion' na' saca'zi'e na' yeyoža' gwlo'e Diosen' naque' beṇe' zaca' juisyw. Da'nan' bososedyaṇe' na' besyeyiljwyože' non' seļa' Diosen' gaclene' chio' na' batcan' yide'.

¹² Na' Diosen' bzejni'ide' legaque' che da' ca' bosozoje' cont gosenezde' gaquen che chio' zoacho

na'a na' gague che cuingaque'. Na' na'a Spiriton' dan' za' gan' zoa Diosen' ba benen cont gwnita' bene' goseyixjue'ede' le'e diža' güen che Criston', na' diža' güen chen' naquen lebe len dan' bosozoj da' bene' ca' goso'e xtiža' Diosen' cani'. Na' lente angl che Diosen' chesezelaže' yesejni'ide' naquen' chaclen Diosen' chio'.

Cheyała' gac lažda'ochon' xilaže' len yogo' da' choncho

¹³ Da'nan' cheyała' soale len toze xbab na' gonle con ga zelao saque'le cont gonle can' chazlaže' Diosen'. Cheyała' soale yebele gon Diosen' gac-chgua mba chele caten' yid Jesucriston' da' yoble.

¹⁴ Na' da' nacle xi'in Dios cheyała' gwzenagle che', na' bich gwzenagle che da' malen' can' gwna lažda'olen' gonle cana' cate' biņa' šejni'ile che Diosen'.

¹⁵ Dios nan' ba gwleje' chio' naccho xi'ine', na' le' naque' bene' laždao' xilaže'. Na' con ca nac le' bene' laždao' xilaže', lecze can' cheyała' gaccho bene' laždao' xilaže' len yogo' da' choncho.

¹⁶ Le Xtiža' Diosen' nyojen žan: "Cheyała' gacle bene' laždao' xilaže', le neda' Dios naca' bene' laždao' xilaže'."

¹⁷ Chio' choļ güižcho Diosen' che'chone': "Xato' Dios". Na' Diosen' chchoglagüen' che to to chio' beňach še nocho napcho doļa' ca nac da' choncho, na' toz can' chone' len note'tezcho. Da'nan' cheyała' žebcho goncho da' bi chazlaže' Diosen' šlac zoacho yežlio nga.

¹⁸ Nezecho Diosen' ba bebeje' chio' lo da' ca' bosozejni'i da' xoxxta'ocho ca' chio' da' bibi zaca'. Na' nezecho ca nac no mechw de plata o de oro na'

bichle da' ca' chesede chen, bi goc yesyebejen chio' lo da' ca' choncho da' bibi zaca'.

19 San byažjen gwsela' Diosen' Criston' blalj xchene' da' zaca'chgua. Na' le' bnežjw cuine' gote' cont bebeje' chio' lo da' ca' bibi zaca'. Na' Criston' zaca'lebe' ca to xila' dao' be bibi yižgüe' da', be bibi naqueba'. Ben' nac ca' gosot bene' Israel gualaž cheton' cont bezi'xen Diosen' xtoła'gaque'.

20 Za' xe yežlion' Diosen' gwleje' Criston' cont bnežjw cuine' neche xtoła'chon'. Na' Diosen' gwsele'ne' nga na'a ba zoa te che yežlion' cont chaclene' chio'.

21 Na' Criston' chone' cont zoacho chejnilaže'cho Diosen'. Na' Dios nan' bosbane' Criston' ladjo bene' guaten' na' blo'e nac Xi'ine' Criston' bene' zaca' juisyw. Nachen' zoacho chejnilaže'cho Diosen' na' zoacho lez gon Diosen' güen len chio'.

22 Na' da' chaclen Spiritw che Diosen' chio', ba chzenagcho diža' li che Diosen' na' choncho can' že'. Da'nan' ba beyac lažda'ochon' xilaže', na' da'nan' do laže'cho ba chaquecho yezica'chle bene' chesejnilaže' Jesucriston'. Na' ca'cze cheyala' goncho, cheyala' gaque lježcho do yichj do laže'cho, gague gaquechone' de diža'ze.

23 Xaxna' chio' zoacho yežlio nga zjanaque' bene' chesat, perw gague neche da' goljcho len legaque' naccho xi'in Dios, san naccho xi'ine' da' bocobe' yichjlažda'ochon' cate' gwyejle'cho xtižen'. Na' xtižen' zoan toli tocaņe, gague da' te chen.

24 Chac can' nyojen, žan:

Yogo' benač chesede che' ca chesede che no yixe' dao',

na' yogo' da' chebe benachen' yežlio nga da'
chesacde' zaca'chgvan, zaca'leben ca yej da'
žia yixe'.

Chesebiž yixe' ca' na' chesecquad chesebix yej da'
zjažia yixe'.

²⁵ Perw xtiža' Diosen' zoan toli tocaņe, gague da' te
chen.

Na' xtiže' nan' diža' güen da' ba gwdixjue'eto' len
le'e.

2

¹ Da'nan' cheyla' cuejyichjcho yogo' bite'teze
da' xinj da' choncho. Bi gonlaže'cho, bi goncho
contze yesaque beņe' naccho beņe' güen, bi xi'acho
beņe', bi necho diža' mal che beņe'.

² Na' ca bi' che'en dao' žan yesaže'be' xiže'gacbe',
can' cheyla' selaže'cho yenecho xtiža' Diosen', le
naquen da' güenchgua, na' cate' chzenagchon cha-
clenen chio' cont choncho can' cheyla' gon chio'
ba de yela' mban checho toli tocaņe.

³ Le ba chacbe'echo ņa'a Xancho Criston' naque'
beņe' šagüe'.

Criston' zaca'lebde' ca to yej squin che yo'o

⁴ Cheyla' gwzenagcho che Xancho Jesucriston'
ben' choñ chio' yela' mban toli tocaņe. Beņe' zan
cheseque'ede' le' la'czla' Diosen' gwleje'ne' cont
chaclene' chio' na' zaca'chgüe' len Diosen'. Da'nan'
Jesucriston' zaca'lebde' ca to yej güen da' gwlej
beņe' cont gaquen yej squin ližen', perw beņe'
gosoñ žinņa' bi gosazlažen' na' gosebequen' šļa'ale.

⁵ Na' chio' napcho yela' mban da' chejnilaže'cho
Jesucriston'. Da'nan' yogo'cho txen zaca'lebcho ca
yej ca' da' zjancua' zjangoden' gan' chac yo'o de

yejen'. Na' zaca'lebcho ca' liž Diosen' dan' zoe' len chio'. Lecze zaca'lebcho ca bꝛoz beṇe' zjanac lo na' Diosen', le naccho lo na' Diosen' na' chaclen Jesucriston' chio' cont zoaczcho chonxencho Diosen' con can' chazlaže'.

⁶ Na' Xtiža' Diosen' nyojen, žan:

Sela' to beṇe' ciuda Sión na' zaca'lebde' ca to yej da' zaca' da' gwlej beṇe' cont gaquen yej squin liže'.

Na' note'teze ben' šejnilaže' le', gwbatech yetinjde' da' gwyejnilaže'ne'.

⁷ Nach len chio' chejnilaže'chone', Jesucriston' naque' leca beṇe' zaca'. San beṇe' bi chesejnilaže'ne', nyojczye da' nga čhegaque', žan:

Yej da' bi gosaclaže' beṇe' güen yo'o ca' yosočhine', len ba naquen yej squin.

⁸ Na' lecze ca' žan:

Zaca'lebde' ca to yej da' chčhego' beṇe' na' ca to yej da' chgo'o ni'e na' chjasebiže'.

Nyojen žan chesečhegüe' le bi chosozenague' xtiža' Diosen'; na' Diosen' bžie' bia' yesac čhegaque' ca'.

Chio' chejnilaže'cho Diosen' naccho xi'ine'

⁹ Na' chio', Diosen' ba gwleje' chio' cont chejnilaže'chone'. Na' len Diosen' naccho ca rey na' ca bꝛoz. Gwleje' chio' cont naccho nación čhe', na' nactecho diaža' čhe', le chaclaže' čixjue'echo catec da' güen juisyw chone'. Le'na' bebeje' chio' lo da' malen' bencho na' gwlo'e be'ni' xen čhen' lo' yichjlažda'ochon' cont soacho goncho da' güen.

¹⁰ Cana' le'e bi gwyejnilaže'le Diosen' na' bi gocle nación čhe', perw na'a ba nacle nación čhe'. Cana' bina' yeyaše'de' le'e, san na'a Diosen' ba beyaše' beži'ilaže'de' le'e.

Cheyała' goncho can' chazlaže' Diosen'

11 Chacda' le'e beṇe' migw, na' chṇeyoeda' le'e le gon xbab le yežlio nga bi naquen lažle. Da'nan' bitw gonle bite'teze da' xinj da' žan gonle len cuerp chelen', le še gonlen, gwžonen soa yichjlažda'olen' binlo len Diosen'.

12 Le soa le gon da' güen cont beṇe' ca' bi chesejnilaže' Diosen' yesele'ede' da' güen da' chonle, na' la'czla' na'a chesezi'diže' le'e chesene' chonle clele, žin ža yesele'ede' chonle da' güen na' yesonxene' Diosen' cate' žin ža chogbi'en nac gac che to toe'.

13 Da' chejnilaže'le Xancho Criston', le gwzenag che yogo' beṇe' ba bosozoa beṇačen' cont yeseṇabi'e le'e. Le gwzenag che rey ben' chnabia' doxen gan' zoachon',

14 na' lecze le gwzenag che beṇe' gwnabia' ca' chsela' reyen'. Le nac lo na'gaque' yesone' castigw che beṇe' ca' cheson da' xinj na' yesonxene' beṇe' cheson can' cheyała' yesone'.

15 Diosen' chaclaže' goncho da' güen cont beṇe' ca' bi chesejni'i che', ben' zjanchol yichjlažda'ogaque', bi žel diža' da' yeseṇe' yosocuiše' chio'.

16 Cheyała' soa cuezcho mbalaz da' bich yo'ocho lo na' gwxiyen', perw bi goncho xbab guacte goncho bi da' xinj. San cheyała' soa cuezcho mbalaz da' yo'ocho lo na' Diosen', na' yo'ocho lo ne'en cont goncho con dan' chazlaže' goncho.

17 Cheyała' gapcho bala'aṇ yogo'lol beṇe'. Na' cheyała' gague beṇe' lježcho beṇe' chesonxene' Jesucriston'. Cheyała' žebcho goncho da' bi chazlaže' Diosen'. Na' cheyała' gapcho beṇe' gwnabia' chechon' bala'aṇ.

Criston' byo b̄cheje' dan' gwxaca'zi'ena'

18 Le'e chonle žin che bene', le gwzenag che xan žin chele da' chaple legaque' bala'an. Gague tlaoze gwzenagle che xan žin chelen' še zjanaque' bene' šagüe' bene' yo'o xbab, san lecze le gwzenag chegaque' še zjanaque' bene' znia.

19 Še bibi da' mal nonle na' bia'cze chosoči chososaque' le'e, chebe Diosen' chyo ch̄chejle len da' chesonde' le'e lagüe nezele chaclaže' Diosen' goncho ca'.

20 Perw bibi zacan' še ba benle bi da' xinj na' chyo ch̄chejle cate' chesebaže' le'e. San še chosoči chososaque' le'e cate' chonle da' güen na' chyo ch̄chejle len da' chesonde' le'e, nachle chebe Diosen' le'e.

21 Le Diosen' gwleje' chio' cont gwyo gw̄chejcho len bi da' yosoči yososaca' bene' chio', na' Criston' gwxaca'zi'e neche chio' na' byo b̄chejde' len da' goc che' cont nezecho ca'czen' cheyała' goncho.

22 Bibi da' xinj ben Criston', ne to diža' güenlaže' bi be'e.

23 Cate' gosezi'diža' bene' le', bi boži'e dižan' nac ca' len legaque'. Na' cate' bosochi bososaque'ne', bi gwne' yebi'e mal len legaque'. Ben cuine' lo na' Diosen', le gw̄nezde' Diosen' chogbi'en yesezaca'zi' bene' ca' con can' cheyała' gac chegaque'.

24 Criston' bnežjw cuine' neche xtoła'chon' cate' gosote'ne' le'e yag cruzen'. Da'nan' cheyała' cuejyichjcho da' xinjen' choncho na' soacho goncho da' güen. Gwxaca'zi'e cont bozoe' chio' binlo.

25 Goccho ca xila' be gosacžeje, perw na'a ba naccho ca be yo'o lo na' xamba' cont chyoeba', le Criston' chgüia ch̄ne'e chio' na' yo'o lo ne'e

lažda'ochon' chcuas chcue'ejen' len da' malen'.

3

Can' cheyała' yeson beņe' zjanšagna'

¹ Na' lecze le'e no'ole nšagna'le, to tole cheyała' gwzenagle che beņe' chele. Bale' biņa' yosozenague' xtiža' Diosen', na' še gwzenagle čhegaque', yesacbe'ede' xtiža' Diosen' naquen da' güen la'czła' bibi ye'ne'. Na' yosozenague' che Diosen'

² cate' yesele'ede' chaple legaque' bala'an na' chi' yichjle soa cuezle cont lažda'olen' gaquen xilaže' len Diosen'.

³ Na' le'e no'ole, bi nacho naquen da' žialao gon cuinle xdan yopa'a no yichjle, gwguala' yenle no bga', gwguala'le no ret, co'ole no niy de oro, na' chazle lache' šagüe'.

⁴ Dan' nac da' žialao, gac lažda'olen' güen, la'czła' nono chle'e len. Zaca'chguan len Diosen' gaccho beņe' nexjwlaže' na' beņe' xenlaže', le bi te che yichjlažda'ochon'.

⁵ Gosenita' no'ole cani' no'olen' gosejnilaže' Diosen' na' goson cuine' lo ne'e. Legaque' gosaque' beņe' nexjwlaže' na' beņe' xenlaže' na' bosozexjwyichje' cont gosone' bin' gwna beņe' che to toe'.

⁶ Da' Sara, no'ol che da' xozxta'oto' Abrahanna', gwzoe' bzenague' che beņe' che' na' gože'ne': "Xana". Na' le'e še soatezle gonle da' güen na' bi žeble, nach yesena beņe' nacle xi'in da' Saran' lagüe chonle can' benen'.

⁷ Na' le'e beņe' byo nšagna'le, lecze cheyała' gacle beņe' šagüe' len no'ol chele na' gaplene' bala'an, le

bi zjanaque' bene' gual can' nac chio' bene' byo. Na' lecze can' ba nži'ilaže' Diosen' chio' na' none' chio' yela' mban toli tocañe, ca'tezeczen' ba none' len legaque'. Nachen' cheyała' goncho güen len legaque' cont bibi gwžon gwzenag Diosen' checho cate' chol güižchone'.

Can' goncho še yosoči yososaca' bene' chio' la'czła' choncho da' güen

⁸ Yogo'cho cheyała' goncho toze xbab na' cheyała' yeyaše'cho lo' lažda'ochon' še bi da' chac che bene' lježcho. Cheyała' gaque lježcho do laže'cho ca bene' biše' lježcho, na' cheyała' gaccho bene' šagüe' len bene' lježcho na' bi gon cuincho bene' xen.

⁹ Še bi da' mal cheson bene' len chio', bi nacho lecze da' mal yebi'icho len legaque'. Na' še bene' chesezi'diže' chio', bitw yoži'icho dižan' nac ca' len legaque', san nabcho gac da' güen chegaque'. Le Diosen' ba gwleje' chio' cont goncho ca' na' cont gone' latje soacho mbalaz.

¹⁰ Goncho ca' le nyojen, žan:

Bene' chaclaže' soa cueze' mbalaz, cheyała' gwsaque' bich güe'e bite'teze diža' mal, na' gwsaque' bich güe'e bite'teze diža' güenlaže'.

¹¹ Cheyała' cuejyichje' yogo' da' mal na' gone' da' güen.

Cheyała' cuec yichje' gone' con ga zelao saque'de' cont soe' binlo len bene' lježe'.

¹² Le Xancho Diosen' chgüia chñe'e bene' ca' cheson da' zej to licha, na' chzenague' chegaque' cate' chosoļ güiže'ne'. San bene' ca' cheson da' xinj, Diosen' ngüie' gone' cont yesezaca'zi'e.

13 Na' nono zoa no gone chio' mal še zoatezcho choncho da' güen do yichj do laže'cho.

14 Na' la'czla' še tgüej cate' yosoči yososaca' bene' chio' lagüe choncho da' zej to licha, Diosen' gone' soacho mbalaz. Na' bi cheyała' žebcho bene', neca gacžejlaže'cho.

15 San cheyała' gonxencho Criston' lo' lažda'ochon', le naque' Xancho. Na' bate'teze cheyała' soacho probnidw cont yoži'icho xtiža' bene' še yesenabde' chio' bixchen' zoacho lez šjayzoacho len Diosen' toli tocanē. Na' cheyała' gapcho legaque' bala'an na' güe'lenchone' diža' šagüe'.

16 Tža tža cheyała' goncho cont nezecho lo' yichjlažda'ochi bibi doła' napcho len Diosen'; nachen' cate' yesezi'diže' chio' da' chejnilaže'cho Criston', yesacbe'ede' le choncho güen na' yesacde' zto'.

17 Yejni'a saca'zi'cho neče choncho da' güen, še can' chaclaže' Diosen' gac checho, clēl ca saca'zi'cho neče choncho da' xinj.

18 Le Criston' lecze gwdi gwxaque'. La'czla' gwyecze' to licha len Diosen', bnežjw cuine' gote' neče xtoła' beňach tni'aze, na' da' bene' ca' zaca'czen' toli tocanē. Gote' cont ba bozoe' chio' binlo len Diosen'. Perw la'czla' gosote'ne', beyas bebane' ladjo bene' guaten', dan' ne' zoa spiritw chen'.

19 Na' len Spiritw chen' gwyeye' jatixjue'ede' xtiža' Diosen' len bene' ca' ba zjanyeyw gan' yesezaca'zi'e toli tocanē.

20 Legaque' bi bosozenague' che Diosen' ža gwlaste, la'czla' gwdape' yela' chxenlaže' len legaque', gwleze' yosozenague' šlac da' Noén' bene'

to barcw xen. Na' to chopga bene' goso'o lo' barcon' na' bi gosebiaye'e lo' nisen', con xono'gue' besyela.

²¹ Na' dan' goc ca' cani' zaca'leben can' ba gwzoacho nisen' lagüe dan' ba de yela' mban checho toli tocañe. Na' gague gwzoacho nisen' cont beyaccho xilaže' len cuerp chechon', san gwñabecho Diosen' beyone' lažda'ochon' xilaže' cont nezecho bibi doła' napcho. Na' ba nac lažda'ochon' xilaže' na'a lagüe beban Jesucriston' ladjo beñe' guaten'.

²² Na' na'a Jesucriston' ba beyepe' yaban' gan' chnabi'e txen len Diosen', na' chosozexjw yichj yogo' angl na' yogo' nochle no nape yela' chnabia' chosozenague' che'.

4

Diosen' none' da' gon to tocho cont chaclen lježcho

¹ Criston' goque' beñe' bela' chen na' gwxaca'zi'e yežlio nga, da'nan' chio' cheyała' gonchachlaže' cho bi gacžejlaže'cho cate' saca'zi'cho. Goncho ca', le cate' ba gwzaca'zi'cho chaclenen bich chzenagcho che da' malen'.

² Na' še bi chzenagcho che da' malen' šlac ñe' mbancho, nach soa cuezcho bi goncho da' mal da' žan gon chio' beñach, san soa cuezcho goncho con can' chazlaže' Diosen'.

³ Cana' gwzoale benle con can' cheson beñe' bi chesejniłaže' Diosen'. Benle da' nac yela' zto', benle bite'teze da' mal da' gwzelaže' lažda'olen', gwzožele, benle no žaš len lni chelen' na' güe'ejchguale, na' gwyejniłaže'le l gua'a lsaca' da' ca' gwna Diosen' bi cheyała' šejniłaže'chon.

⁴ Na' bene' ca' ne' cheson ca' chesyebande' bich chonle txen len legaque' can' chesaše' chosožiayi' cuingaque', nach chesezi'diže' le'e.

⁵ Perw žin ža cate' Diosen' nabyožde' legaque' che yogo'lol da' ba gosone', Dios ben' chbeze' chogbi'en nac gac che bene' zjamban len bene' ca' ba gosat.

⁶ Le da'nan' gwsele' bene' goseyixjue'ede' diža' güen che' len bene' ba gosat can' goseyixjue'eden' len chio'. Diosen' goclaže' yesenite' mbalaz toli tocane' can' zoa le', la'czla' nchoglagüen' de yela' got che yogo' benach yežlio nga.

⁷ Ba zoa te che yežlion'. Da'nan' cheyala' soacho len toze xbab na' goncho byen goncho can' chazlaže' Diosen' cont bibi gwžon soacho yol güižchone'.

⁸ Na' da' nac da' žialaoch, cheyala' gaque lježcho do yichj do laže'cho, le cate' chaque lježcho chezi'xencho chegaque' bite'teze da' chesonde' chio'.

⁹ Na' cheyala' gwlebcho bene' lježcho cate' yeside' ližchon' sin cbi bixjwcho.

¹⁰ Con can' ba goclen Diosen' to tocho da' none' chio' grasyw che bi da' chac choncho, can' cheyala' gaclen lježcho len dan' choncho. Cheyala' gwčhincho bite'teze grasyw da' non Diosen' chio' con can' chaclaže' gwčhinchon, le nža' nža'te da' none' che to tocho choncho.

¹¹ Še Diosen' ba none' checho chixjue'echo xtižen', le xtiže' na'zen' cheyala' chixjue'echo. Na' še ba none' checho gaclencho bene', cheyala' gaclenchone' do yichj do laže'cho, le Diosen' chone' cont chac chaclenchone'. Cate' bi da' goncho, gonchon ca gacxen Diosen' da' gwsele' Jesucriston'

len chio'. Zaca'cze' gonxenhone' toli tocaṇe na' zaca'cze' ṇabi'e toli tocaṇe. Can' gacšca.

Guata' da' saca'zi' chio' chejnilaže'cho Criston'

¹² Chacda' le'e beṇe' migw, na' chaclaža' bi yebanele can' chac ḥhelen' chosoḥi chososaca'chgua beṇe' le'e. Bi naquen da' yebanele, san gwlo'en še da' li chejnilaže'le Diosen'.

¹³ Cheyaḷa' yebele caten' chzaca'zi'le da' chejni-laže'le Criston', le chac ḥhele can' goc ḥhe Criston' caten' gwxaca'zi'e. Le yebe caten' chzaca'zi'le cont lecze yebele na' soale mbalaz cate' žin ža le'ele yid Criston' ben' nac beṇe' zaca' juisyw.

¹⁴ Mbalaz chac ḥhele ṇa'a cate' chesezi'diža' beṇe' le'e da' chejnilaže'le Criston', le Spiritw ḥhe Dios ben' nac beṇe' zaca' juisyw zoan chaclenen le'e. Beṇe' ca' chosoḥi chososaque' le'e cheseṇe' mal ḥhe Criston', san le'e chonxenḷne'.

¹⁵ Na' še saca'zi'le, yejṇi'a gaquen neḥe chonḷe da' güen, gague neḥe da' betwle beṇe' o gwlanḷe da' de ḥhe beṇe' o benḷe bichle da' xinj o blaže' ḥhele len bi da' chac ḥhe beṇe'.

¹⁶ Le še saca'zi'le neḥe chejnilaže'le Criston', bi cheyaḷa' gaquele zto' can' chac ḥhele, san cheyaḷa' gonxenḷe Diosen' da' ba chejnilaže'ḷne'.

¹⁷ Ba bžin ža Diosen' ba chone' cont chyi chzaca' chio' naccho xi'ṇe' neḥe bi da' xinj da' choncho. Na' dan' chone' ca' zgua'tec len chio' naccho ca beṇe' lo' yo'o ḥhe', nezecho leca gwnežjwche' da' yesezaca'zi' beṇe' ca' bi chosozenag diža' güen ḥhen'.

¹⁸ Na' ca nac beṇe' zja'ac to ḷicha, nacchguaze yesyele' bi yesezaca'zi'e toli tocaṇe, nach beṇe'

bi chesejnilaže' Diosen' na' chesonteze' da' xinj, gague bi de da' yosla legaque'.

¹⁹ Da'nan' cate' chsi' Diosen' xnezen' chyi chzaca'cho, cheyała' soacho gonczcho da' güen na' gon cuincho lo na' Diosen', le len' bene' chio' beñach na' zoacze' chaclene' chio'.

5

Can' cheyała' gon chio' chejnilaže'cho Criston'

¹ Na'achen' de da' nia' le'e nchojle cont chgüia chna' ljež le'e chejnilaže'le Criston'. Neda' lecze nchoja' chona' ca'. Ble'eda' gwxaca'zi' Criston' na' choe'lena' beñe' diža' can' goquen', na' lecze nezda' žin ža šjayzoa' len le' gan' yo'ochgua be'ni' ca le'e šjayzoalenle'.

² Le güia na' beñe' ba gwlo'o Diosen' lo na'le güia na'le, ca no xan xila' chgüia chne'e xila' che' ca'. Le gonen do yichj do laže'le can' chazlaže' Diosen', gague gonlen žan ca žan, neca gonlen cont gonle gan mechw, san le yebe gonlen.

³ Na' ca nac beñe' ca' güia na'le, bi gonle znia cont yosozenague' chele, san soatezle gonle da' chazlaže' Diosen' cont yesele'ede' can' chonlen', na' yesache'ede' lecze can' cheyała' yeson legaque'.

⁴ Xancho Jesucriston' zaca'lebde' ca to beñe' güeyoe' xila' beñe' chnabi'e nochle güeyoe' xila'. Na' cate' yide' da' yoble, cana'ch gone' soale mbalaz juisyw še ba benle xšin Diosen' can' cheyała', na' gague da' te che yela' zoa mbalaz chelen' ca chde che no premio da' chesone' yežlio nga.

⁵ Nach lece ca' le'e be_{ne}' xcuide', cheyala' gwzexjw yichjle gwzenagle che be_{ne}' ca' ba zjan-choj ben' chosogüia chosone'e le'e. Na' yogo'le le gwzexjw yichjle cont gwzenag che lježle, le:

Diosen' chdillene' be_{ne}' zjanac ya'laže',

san chaclene' be_{ne}' chosozexjwlaže' lagüen'.

⁶ Cheyala' gwzexjw yichjcho gwzenagcho che Dios ben' nape yela' guac xen, cont žin ža gone' ga gacxencho.

⁷ Na' cheyala' gwcua'ancho yogo'lol da' chi' yichjcho chen lo na' Diosen', le len' chgüia chne'e chio'.

⁸ Cheyala' goncho byen goncho da' nac da' zaca', na' cheyala' gwsaca'cho cont Satanás dan' chn-abia' da' xigüe' ca' bi co'on chio' to lo nez mal, le chgue'en chio' na' cheyiljwlažen' nac gonen gwžiayin' chio', ca to bež znia chosya'aba' chdaba' chyljwba' be gagwba'.

⁹ Cheyala' soachachcho bi gwzenagcho che Satanásen' na' soachachcho šejnilaže'cho Jesucriston', le nezecho be_{ne}' lježcho ca' chesejnilaže'ne' gate'tezechle lo yežlion' lece chesezaca'zi'e can' chac che chio'.

¹⁰ Perw cate' ba gwde da' chyi chzaca'cho šlož dao' na'a, cuin Diosen' gone' cont gacch yichjlažda'ochon' can' chazlažen', cont šejnilaže'chchone', cont soecho gonchcho can' chnalāžen', na' cont soacho len toze xbab. Dios nan' nži'ilaže'de' chio' na' chaclene' chio' bite'teze da' chac checho, na' ba gwleje' chio' chejnilaže'cho Criston' cont šjayzoacho txen len le' gan' yo'ochgua be'ni'.

11 Cheya_la' soacho gonxen_{ch}one' toli toca_{ne} da' naque' bene' zaca' juisyw, na' n_{ab}ia'che' ca note'tezechle. Can' gonšcaczcho.

Pedron' chguape' tiox bene' ca' yosolab carten'

12 Bene' migw checho Silvano, ben' chacda', zoateze' chone' can' cheya_la' gone', na' ba bzoje' xtiža' le'e cart dao' nga. Na' le'e cart nga ch_neyoeda' le'e soaczle gon_{le} da' g_üen na' chzejni'ida' le'e Diosen' ba goclene' le'e cont _nezele da' _li nži'ilaže'chgüede' le'e. Da'nan' cheya_la' soaczle šejnilaže'lne'.

13 Bene' ca' ba gwlej Diosen' cont chesedop chesežague' chesonxene' Jesucriston' lo ciuda Roma nga chosoguape' le'e tiox, ciudan' da' nsi'a Babilonia. Na' lecze Marcos ben' nona' ca xi'ina' chguape' le'e tiox.

14 Cate' chdop chžagle txen le gwnopa' na' lježle cate' gwguap lježle tiox cont gachia' chaque lježle.

Na' ch_naba' yogo'le chejnilaže'le Criston' soa cuezle bin_{lo} len xbab da' yo'o lo' yichjlažda'olen'. Da' na'zen' chnia'.

**Diža' güen che ancho Jesucristo
New Testament in Zapotec, Zoogocho
(MX:zpq:Zapotec, Zoogocho)**

copyright © 1987 Wycliffe Bible Translators, Inc.

Language: Zapotec, Zoogocho

Translation by: Wycliffe Bible Translators, Inc.

Zapoteco, Zoogocho [zpq], Mexico

Copyright Information

© 1987, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Zapotec, Zoogocho

© 1987, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 18 Apr 2025 from source files
dated 29 Jan 2022
de7d40fb-3909-53d8-8bea-744cf1ce0e41